

տոչորման մերոյ ի տարանջատութիւն զաւակին մերոյ՝ որ այսօր սեւ խապար նորա եհաս ի մեզ . միթէ չէ՞ր հերիք խարխափումն սրտից մերոց ի մրրկէ կարօտանաց նորա՝ որ այսօր մահուն հոչակն զսիրտս մեր նոր կրակով բորբոքեցոյց: Վա՛յ մօրս տառապելոյ, զի մորմոքի սիրտ իմ ի ձգտումն տեսութեան եւ ոչ կարեմ հասանել: Եղո՞ւկ հօրս թշուառութեան, ժամանել ջանամ եւ ոչ կարեմ տեսութեան անգամ, միթէ եկի՞ց ի վերայ երեսաց իմոց տեսանել միայն զգերեզմանն եւ առնթեր թաղիլ մնալ: Վա՛յ ծնողիս եղկութեան, զի գալարի լեարդ իմ ի գուժ որդեկին իմոյ, թալիթլի՛) աղիք իմ հրով բոցոյ ի վերայ զարեպ անգրանկին իմոյ մեռելոյ: Ո՞վ տայր զզլուխ իմ ծով առնուլ եւ զաչերս աղբիւրս արտասուաց: Արդ չորասցի արգանդ իմ, զի ոչ կարեմ եւս զայնպիսի զաւակ ծնանել. գօսասցի ծառն, զի ոչ եւս կարէ զայնպիսի ոստս վայելուչս արձակել. խլեսցի յարմատոյ որթս, զի ոչ եւս կարէ զնոյնպիսի բերել բարունակ ողկուզաբեր. կտրեսցի տապարաւ տունկս, զի ոչ եւս կարէ պտուղ քաղցրահամ պտղաւորել. խաւարեսցին այսուհետեւ աչք մեր, զի ոչ եւս կարեմք զայնպիսի գեղեցկատիպ որդի տեսանել. պակասեսցին լոյս ականց մերոց, զի ոչ եւս կարեմք զայնպիսի անդրանիկ հասուցանել՝ չքնաղ եւ վայելչահասակ որպէս զՈհանդ. երերասցի տուն մեր եւ զղրգեսցի քաղաքս մեր ընդ մեզ ի գէպ կոծմանս: Ո՞վ ցաւագին դառնութեանս, ի պանդուխտ վայրիդ անտես յաչաց մերոց խլեալ զորդին մեր յանդառնալին ճանապարհ: Ո՞վ անըմբերելի բեկմանս, զի անյոյս աշխարհի տարագրեալ զաւակն մեր: Ո՞վ տայր մեզ զմահն քո տեսանել, ասէ, որդեա՛կ իմ Ոհան: Զի՞նչ արասցէ եւ

1) Թաթիթլի.